

中興小紀二



中興小紀

(二)

熊克撰

中興小紀卷十五

紹興三年秋七月丙辰左僕射呂頤浩辭提舉國史不允上曰朕觀歷代史後人皆不及前人遷固雖下於左氏辭猶奇偉范蔚宗以還不足觀也至唐史尤不及前人遠甚頤浩曰陳壽三國志亦佳上曰壽頗簡略事實多在注中又諸家互相矛盾席益曰歐陽脩五代史乃有褒貶義例過范蔚宗等遠矣工部侍郎歷城李擢奏乞參紹聖大觀法別立博學宏詞一科己未詔從之時行在百官以職之高卑而差其人數多寡月給雇募之直亦是擢請之也時大旱上曰和買未爲良法今支錢一千州縣吏更不奉行重困吾民可下監司覈實勿爲文具甲子手詔略曰朕於民事未嘗敢緩其和買紬絹錢已虧而多有不支民咨怨而傷和氣因以致旱可索逐路未支實數條上言者謂艱難以來中原隔絕祖宗開國功臣子孫凋喪幾盡乞訪其後量才錄用從之樞密院計議官王大智所造戰車不可用壬申詔罷之上曰器械之利古今異宜古所便者未必便於今然古人雖用亦或不利如驂絙而止之類蓋車非利器也席益曰古人用車或勝而後人用之必敗蓋古人彼此用車至於彼徒我車已有侵軼之懼而後人每以車敵騎其敗固宜呂頤浩曰房琯失利於陳濤正坐此也甲戌宰執奏置孳生監牧馬呂頤浩因論廣西買馬雖置提舉官須令帥司與之直庶無乏事上曰固也然當擇帥若不擇人而每事待朝廷處置則雖百執亦不能辦治天下者要在官得人而使之各任其事則天下治矣時置監於饒州以左朝請大夫

郝漸爲提舉孳生監牧事。然馬性利高寒。鄱陽地卑溼。旣而因暑。馬死者衆。漸坐此罷。先是講筵所祇應人經進書推恩內門下後省。私名莫允中拔進義副尉。左司諫唐煇論以爲不當。乞追改。煇。吳縣人也。己卯。宰執進呈。上曰。此講筵所奉御寶批也。旣有例當行。席益曰。此事固有前批。然副尉而煩諫官論列。乞陛下允所奏。上領之。徐俯曰。旣有例當如何。上曰。然。凡朝廷事旣有例。因言者論列而改。則是朝廷所行果非也。且此小事。非繫國體。呂頤浩固請從煇之說。上可之。先是久旱。中雖得雨。微潤而止。上極憂勞。省躬脩政。而圖嘉應。至於祈禱。皆蔬食以致潔誠。自此月己巳之後。屢雨。至是始足。庚辰。上謂宰執曰。日者亢陽。朕甚慮之。以爲穡事無望矣。今霑足如此。殆將有秋。春秋三百四十年。書大有年者一。有者再而已矣。以此知難得也。呂頤浩等退。而相謂曰。上至誠憫雨如此。宜豐年之來格也。初。劉豫將李成。統衆與金合兵二萬。攻廬氏縣。河南鎮撫使董先率兵五千禦之。衆寡不敵。遂棄元守州縣。將二千餘人退寓襄陽府。願聽李橫節制。許之。金僞兵復犯襄陽。橫以食盡不繼。遂引其兵棄城而遁。金僞兵南至隨郢。遠近震恐。橫欲奔荆南以俟朝命。其屬趙去疾。閻大鈞等。勸使歸朝待罪。橫曰。我有烏合之衆。所至自謀衣食。人皆指爲賊。萬一諸部不見納。若何。二人曰。我亦官軍也。何至是。旣而鄂帥鈞洪道果拒之。橫大怒。欲殺二人。皆呼曰。江西帥趙樞密可歸也。橫猶未決。而趙鼎已遣米船至。其衆遂安。董先與信陽軍鎮撫使牛皋。先渡江至洪州。鼎復以銀數千兩犒橫之衆。且檄知黃州鮑貽遜迎勞於境。橫大喜。是月。詔橫駐洪州。旣而鼎發橫赴闕。將佐以下隨之。橫至闕。爲桑仲訟冤。乃追洪州都監霍明。送大理鞠之。亦竟薄其

罪。時召德安鎮撫使陳規至行在。規首乞罷鎮撫使。又言諸將跋扈。請用偏裨以分其勢云。詔復沿海制置使。乃以殿前都指揮使郭仲荀知明州兼之。仲荀將兵三千之任。因陛辭乞解軍職。遂加檢校少保。仲荀至明。正當風汛。賊舟南來之時。卽遣小舟入海爲斥堠。屯兵港口。據要會以待之。八月己丑。宰執奏分屯軍馬遠近輕重。呂頤浩曰。第恐無糧。上曰。撫國家給饋餉。自古亦須運糧。豈有無糧之理。余塔初叛遼主。亦以讒言不給糧之故。往附女真也。時言者欲罷都轉運司。於是度支郎中侯懋等言。自發運司罷後。上供錢物頓失。遂改爲都漕。蓋緣以辦上供爲事。今罷此。亦可省吏之費。第諸路漕臣。又以上供移用。他時復置。卽非朝廷舉措。矧自置司一歲間。已增八十餘萬貫矣。第漕臣不得自便。故同忌嫉。以此見存廢利害甚明。庚子。詔從之。上以雨暘不時。又蘇湖地震。甲辰。詔中外之臣。令極言無隱。先是諸州有積年所欠禁軍闕錢。已委逐路憲司起發。上復恐不便於民。遂諭宰執。令速蠲放。繼又手詔三省樞密院行之。大指慮有追呼禁繫。蓋以不忍人之心。行不忍人之政。至是上又曰。紹興元年以後。合椿之數。亦未須起。欲與諸路招軍令填足舊數也。初。河南布衣王忠民。隱居不出。靖康中。因上書被召。又嘗以策干長安帥范致虛。致虛喜。欲致之不能。時諸鎮如翟興、董先、李彥仙。皆禮重之。劉豫僭立。忠民作九思圖。及定亂四象。遣人達金寨與故遼之境。以斷天下之疑。宣撫處置使張浚。補以官不受。復薦之。至是忠民詣行在。左僕射呂頤浩。僉書樞密院徐俯。謂之曰。上知君來甚喜。旣見上。所奏皆留中。授右宣義郎。忠民辭不獲命。則以告納於牘中。藏之七寶山下而去。後撰三國和議狀。遣使臣岳知常散於敵中。知常越豫

境被執。忠民於是編置福州。未幾得免。初同僉書樞密院事韓肖胄、工部尚書胡松年、使金。道經淮甸。

見田畝多廢。骼骯相屬。密附奏。乞展限起常賦。及立賞掩遺骸。以廣上恩。是月肖胄等至雲中。軍前與金議和。金頗見信。而有悔禍之意。給事中黃唐傳言。都漕不可罷。力營救之。於是言者論唐傳附會大臣。

九月乙卯。以唐傳爲徽猷待制。提舉太平觀。未幾落職。丙辰。兼詳定一司敕令章誼言。比修紹興敕令。

格式。書務速成。論靡專決。州縣推行。已漸見抵牾。望詔監司守臣條上新書之闕。命官審訂。去其譌謬。著

爲定法。從之。右僕射朱勝非等奏。近泉州水暴發。隳城郭廬舍。已行詰問。上曰。國朝以來。四方水旱。無

不上聞。故修省蠲貸之令。隨之。近日蘇湖地震。泉州大水。輒不以聞。何也。乃詔諸路有水旱。監司郡守。卽

時具奏。如敢隱則置之法。時天象多變。臺諫交章論左僕射呂頤浩之過。而殿中侍御史常同疏其十

罪。戊午。罷頤浩爲鎮南軍節度。開府儀同三司。提舉洞霄宮。制下。言者又請鑄去將相崇資。於是改觀文

殿大學士宮祠如故。諡昭慈獻烈皇后曰昭慈聖獻。己未。詔略曰。昨舉祖宗之制。欲杖賊吏於朝堂。

亦以刑止刑之義。復思祖宗時。絹值不滿千錢。故以一貫三百計匹。後因論列。遂增至二貫足。今絹價不

下四五貫。豈可尙守舊制。每匹宜更增一貫足。今後賊吏犯法。夫復何言。先是皇后父邢煥卒。妻福國

夫人熊氏進狀。乞賜第及官子弟門客。皆踰常制。癸亥。上令補二子官。一子有官者進二秩。餘悉不行。且

顧宰執曰。祖宗待戚里皆有常憲。朕不敢踰。豈以后族故私之耶。後復以皇后受冊乞恩。上曰。朕於外戚

不敢有私也。況待后家。又不敢與宣和皇后家等。前此官邢氏中外戚。已減於韋氏矣。乃詔追贈煥少師。

嘉國公許造進酒而已。甲子起居郎曾統言。本朝多以諫臣兼記注。且聽直前奏事。元豐更制。不復併任諫列。然有事亦許直前。頃者權臣用事。言路寢壅。居是官者。既無言責。率以出位爲嫌。甚非祖宗兼聽之意。乃詔依元豐舊制。丙寅。詔江西大帥趙鼎兼制置大使。既又詔江西制置使岳飛。駐軍江州。而舒蘄二州亦隸節制。初。飛與前帥李回不協。至是。鼎至。誠待之。飛亦心服。江陰軍進士李翰。蘇白。違詔不詣檢院。乃伏闕上書。是日。詔押赴本貫。上曰。所言者皆細務。如戢宗子之類。自可行。非有詆訐之語。顧不當伏闕耳。此風皆李綱輩啓之。不可不懲也。上謂宰執曰。議者多言諸大將不可復益兵。此爲不知時宜者。如漢高祖定天下。諸將兵至數十萬。未嘗以爲疑。故能有成功。今劉光世、韓世忠、纔各及五萬。張浚不滿三萬。而議者已患其多。非也。朱勝非曰。漢初諸將最爲用者。韓信、彭越、英布、三四人。兵最多。徐俯曰。光武常中分戲下之師。以與鄧禹。席益曰。方用兵之時。御諸將當如高祖。既定之後。待功臣當如光武。上然之。上自南渡以來。每兩月輒一賞衛士。勝非及其時。則命吏爲文書置袖中。俟命而後進。久而上覺之。問何不早進。勝非曰。此異恩也。當出自陛下。若舉之。非市恩而何。上嘉歎之。殿中侍御史常同言。朝廷設官。有當廢而置。當存而罷者。近諸路屬官。寢增舊員。而寺監之官不除。臣謂當減屬官而復寺監丞。一則分掌郎曹之務。二則養人材以觀其能。三則資淺者不至躡遷。庚午。上謂宰執曰。郎官高選。前此歷寺監丞乃得之。渡江以來。序進人材。則徑至郎官。其議復置。如同言。朱勝非等言。今歲防秋事。上曰。今有兵僅三十萬。當更精擇。止得勝兵二十萬。器械悉備。訓而用之。可以復中原。威外敵矣。豈獨防捍險阻哉。

大理少卿張杓論淮南帥臣守令當加精擇。壬申上曰：縣令尤爲近民，須一任有舉主及格，乃得爲之。比來一切之制行，或初官便爲令，已釐正矣。當謹守之。昔子皮欲使尹何爲邑，子產謂有美錦而使人學製，蓋民之師帥，非練習政經者不可爲也。中書舍人晉陵孫近言：艱難以來，軍期機速之事，先以白劄子行下，然後乃經給舍，循習寢久，凡擬官斷獄之類，亦徑下有司。今欲由舊制，乃詔非機速者，仍命給舍書牘。祕書省正字晉陵陳祖言：乞修建炎以來日歷，從之。冬十月壬午朔，詔昨者遣使出自朕意，授以手歷，澄清諸道，逮胡蒙等還朝，偶緣他事相繼而去，皆非有失使指。深慮四遠不知其由，妄意揣摩，將已行之事，苟簡滅裂，未還二使，不無疑慮。三省可下諸路所陳利害，令監司郡縣遵守，舉薦人材，取旨錄用。自南渡以來，官無籍吏，隨事立文，號爲省記，出入自如。先是言者乞令使將所省記類而成冊，從之。遂詔修七司敕令，又得廣東轉運司錄到元豐元祐吏部法，與七司所省記者參修，命禮部尙書兼吏部洪擬總之，而兵部侍郎章誼同定。擬立朝最久，諳練典故，定著曲當。至是吏部敕令格式書成，而擬除徽猷閣直學士奉祠以去。癸未，右僕射朱勝非上之。上謂宰執曰：武備在於軍器，弓甲尤爲先務。今戰士無慮三十萬，皆披堅執銳，加以弧矢之利，雖強敵無足畏也。然造弓必用良工，兼須善價。今御前所造弓，其直八千，可以爲式，宜令軍器所及張俊軍中分造，庶使盡其藝也。戊子，以工部侍郎李擢爲禮部尙書，尋除徽猷閣直學士知婺州。時荆南制置使王玠總軍討楊幺，至鄂州，玠言湖水瀾漫，未可進兵。壬辰，詔俟水落，速去擒捕。旣又詔西北無歸之人爲賊誘脅者，別給旗榜，付玠招收。甲午，廣西宣諭明橐

言大理國欲進奉及賣馬事。上諭宰執曰：進奉勿許，安可利其虛名而勞民乎？朱勝非曰：異時廣西嘗奏大理入貢，言者指以爲妄，事可爲鑒。上曰：彼云進奉，實利於賈販，但令帥臣償其馬直，則馬當繼至，可增諸將騎兵，不爲無益也。戊戌，詔略曰：朕以眇躬，親逢厄運，愧無德化，而士大夫趨向多歧，附益奔競之風不息，則朋比之勢漸成。若不以時警懼，辨其邪正，尙且曰：內修外攘，得不負愧於天下。可令臺諫察其微而劾之。三省樞密差除，常加遴選，朕有賴焉。淮東宣撫使韓世忠奏：見管兵四萬四千餘人，乞揀去老弱，詔世忠軍練已精，陝西南北山東兵，隨世忠累經出入，難以例汰，令存恤之初。世忠之在建康也，以金衆善射，常以騎兵取勝。世忠乃選少年敢死士爲一軍，號曰背嵬，如古羽林、飲飛之類，皆以一當百，又自出新意，造克敵弓，斗力雄勁，每射鐵馬，一發應弦而倒，蓋二者皆足以制敵，至是愈精矣。初，福建鹽法以三分爲率，二分商販，一分官搬，比年商販殊少，鬻鈔不行，邵武軍判官趙不已上言，乞併令轉運司搬賣，歲認鈔錢二十萬緡，漕司以鈔錢太重，請減爲十五萬緡，從之。時虔寇竊發，多緣羣入閩，廣販鹽以致作亂。至是知梅州陳杲乞散賣小鈔，謂非特可助國計，亦使細民得販，則暗消其爲盜之端。事下權貨務，己亥，本務言福建二分客鈔已令轉運司歲輸一十五萬緡，而廣東亦係官搬，杲所言不惟有侵漕計，兼礙成法，遂格不行。杲，建陽人也。壬寅，以龍圖閣學士曾懋爲禮部尙書，旣而殿中侍御史常同言：懋不當除，遂寢前命。丙午，宰執奏廣南捕盜事，上曰：凡擒盜多緣賊首未殄，遽以奏功，兵退又復聚衆爲寇，兼監司州縣不能恤民，散而爲盜，有盜又不時奏，致使滋長，可嚴戒之。先是手詔吏部注擬姦獘事。

詔意以爲安得以皇甫縛之流。鈐制姦吏。除其弊源。上始用縛事。蓋獨取其初能制吏耳。縛後作姦迎合。數貢羨餘。唐史所譏。上意深嫉。恐臣下不察。有疑御筆。改曰安得如毛玠清公。使天下之士莫不以廉潔自勵。丁未。上謂宰執曰。他時詔未當。三省可使奏陳改定。徐俯曰。陛下始用縛事。特取其爲郎時事。後惡其姦。改以毛玠頌之天下。益足以見盛德矣。己酉。宰執奏事。席益請諸軍所造馬黃弩。改令造弓。詔從之。上曰。弩但可守。戰則須弓。朱勝非曰。前者李橫。牛皋。與金人戰。旣勝之。金益兵來。橫等皆無甲。是以敗。上曰。無甲何以禦敵。今治兵所先者器甲。而弓尤急也。徐俯曰。臣見張俊云。近歲軍中。方知帶甲之利。今有甲士十萬。則無懼於強敵。上曰。俊隨朕久。士之帶甲者。俊練之也。荆南制置使王玠至岳州。水路下流。進兵。先遣統制官右世達領二千人至鼎州。與程昌禹下統制官杜湛合兵。以當上流。令世達聽昌禹指縱。世達勇而和湛。方患兵少。遂與協力攻賊。至龍陽縣之沅洲。奪賊小德山船一。賊連敗。庚戌。官軍入黃誠寨。登僞太子樓。獲龍牀龍屏之類。是日。玠在下流。船小。與賊戰不利。乃留水軍統制官崔增。吳全。於喬口。而自持神武前軍。由鹽陽縣路次於下芷江口。金左都監烏珠。至鳳翔府。與萬戶薩里罕會。再謀攻蜀。又金衆東寇楚泗。時江東宣撫使劉光世駐軍在建康。扼馬家渡。光世將兵直擣廬壽。金人乃引去。崔增。吳全。自喬口進兵。攻賊失利。二將皆渡。王玠與程昌禹議。方欲橫鼎江下流。植樁留船守之。以防賊衝。然後悉衆沂芷江。併力攻賊。將夏誠。劉衝等寨。會鄂州告急。戊申。玠持兵趨鄂。留統制官王渥。趙興等軍。權聽昌禹節制。移駐上芷江口。十一月丙辰。宰執奏修運河事。上曰。有言當役不堪出戰之卒固

不可。又言調民而役滋不可。惟發旁郡廂軍壯城捍江之屬爲宜。至於廩給之費。則不當吝。朱勝非曰。開河似非急務。而饋餉艱難。爲害甚大。故不得已。但時方甚寒。役者良苦。臨流居民。悉當遷避。及富家以僦屋取貲者。皆非所便。恐議者惑之。上曰。禹卑宮室而盡力乎溝洫。浮言何恤哉。開封布衣李漢英上書。以爲國家之弊。在於用柔太過。故敵得逞。丁巳。上曰。沈潛剛克。高明柔克。聖人之德。時剛時柔而已。光武治天下。以柔道行之。復興漢業。顧豈柔爲不可哉。漢英語雖強易。而朕不爲忤也。時劉豫調民修城運糧。又擇其壯者以備戰。戊午。諸路探至。上惻然曰。中原之民亦勞矣。吾民之不陷僞境者。雖兵興有年。朕未嘗敢以科調煩之。庶其休息。夫使民各安田業。治道之要也。朝廷當力行之。自建炎初置司農寺。庚申。始復置丞二員。明年。又得置長貳。僉書樞密院韓肖胄。工部尙書胡松年。使金回。自上卽位。遣使入金十數輩。未嘗報聘。至是。劉豫兵敗。始遣其臣文州團練使李永壽。職方郎中王翊等九人。隨肖胄同來。詔前奉使潘致堯。高公繪。接伴之。朱勝非閒居錄曰。秦檜自初相。奏以河北河東人還金。以中原人還劉豫。乃知檜之議。出於金人也。兵部侍郎趙子晝爲館伴。時敵情反側。人以館客爲難。子晝彌縫應對。而永壽驕倨。肆又命右文殿修撰王倫與之議事。倫爲翊道雲中舊故。翊慢少損。倫卽曰。上嘉公輩遠來。特命倫相勞。此殊恩也。宜拜以謝。二人始拜就命。倫充送伴使。於是殿中侍御史常同言。先振國威。則和戰常在我。若一意議和。則和戰常在彼。靖康以來。分爲兩事。可爲鑒戒。上因從容語及武備。曰。今養兵已二十萬。有奇。同日。未聞二十萬兵而畏人者也。時御史六察所隸官司。有免隸臺察者。常同請依舊制。乙丑。詔閣門客。

省四方館並隸臺察。獨皇城司專掌禁廷。依祖宗法不可易耳。同又言。六曹貳長。拘執繩墨。願少假以權。使隨事裁決。上曰。國朝以法令御百執事。故凡有司以奉法爲能。而不敢以私意更令。三代皆有所尙。兩漢而下。亦各自有制度。祖宗成憲。朕之家法。不敢改也。祕書省言。元豐官制後。國史別置院。所有日厯歸本省國史案。今乞以修國史日厯所爲名從之。初。元祐司馬光爲政。請設十科以取人材。曰。行義純固。可爲師表。曰。節操方正。可備獻納。曰。智勇過人。可備將帥。曰。公正聰明。可備監司。曰。經術精通。可備講讀。曰。學問該博。可備顧問。曰。文章典麗。可備著述。曰。善聽獄訟。盡公得實。曰。善治財賦。公私俱便。曰。練習法令。能斷諸讞。歲令侍從以上各舉三人。紹聖以來。此科遂廢。至是三省樞密院請復舉行。乙亥。詔從之。宣和皇后弟韋淵。乞磨勘遷秩。時淵官爲橫行。吏部言橫行於法無以年勞遷者。丙子。上曰。若宣和皇后來歸。勢必加恩外家。姑留此以需母后之歸可也。乃命留以俟之。吏部郎官劉大中言。鼓鑄爲國利源。度饒兩司歲鑄一百五萬緡。留四十五萬緡循環爲本。合發五十九萬餘緡。而元二年前鑄二十萬緡。截支外止發一十二萬緡。卻同本錢給兵匹總三十五萬餘緡。除實鑄外。虛費一十九萬餘貫。豈止所得不償所費而已。事下工部。本路言。江州廣寧監合鑄二十四萬貫。池州永豐監合鑄三十四萬貫。比經殘破。以兩監工匠池併入饒。江併入虔。外其鑄額合令認發。十二月癸未。詔從之。甲申。宰執奏。故侍御史洪炎葬事。朱勝非曰。此蓋近例。上曰。炎以文學稱。其死有恤典。今旣致言者當罷之。然聞其家貧。可依胡直孺例。支與銀絹。炎蓋黃廷堅之甥也。徐俯曰。庭堅自有親孫。見在臨安府爲筦庫。其家極貧也。先是

建炎中。將作軍器二監。皆併歸工部。己丑。始詔復置監。少監、丞、簿等員。將作乃總少府之事。時監司有闕。或以干堂壬辰言者。請遴揀公正可任之人。書於籍。庶杜其求。且去待闕之弊。上曰。奔競之風未息。每有一闕。必致干乞。可明戒不得具闕。庶少脩士檢也。癸巳。廣西經略使劉彥適言。南丹州莫公晟。領賊兵三千犯觀州。右僕射朱勝非曰。此皆崇觀政和所開新邊。近來往往棄而不守。如觀州亦下本路相度。而帥臣監司以爲所據控扼。不宜棄之。上曰。前日用事之臣。貪功欺罔。其實傷民費財。使遠俗不安也。彥適又乞與公晟一職。詔從之。乙巳。宰執奏。正旦使人入見。故事。百官俱入。上曰。全盛之時。神京會同朝廷。百官之富。所以夸示敵國。今暫駐於此。事從簡便。舊日禮數。無庸俱入。兼元日亦未嘗受賀也。時朝廷館金使。禮既簡。而所乞還俘囚。及西北士民之在東南者。且請畫江以益逆豫之疆。朝廷皆不從。於是李永壽等褫氣而去。時將遣參知政事席益爲報使。而益以母老辭。上問誰可代行。乃薦樞密都承旨章誼。明日誼對。上諭以使金之說。誼徑承命。詔加誼龍圖閣學士以行。

中興小紀卷十六

紹興四年甲寅春正月丁巳宰執論遣使事。上舉申包胥曰。秦伯初無伐吳存楚之志。感申包胥之誠。爲賦無衣。秦師乃出。然則合兩國之成。回難回之意。只在使人耳。鼎澧鎮撫使程昌禹遣統制官杜湛與制置司統制官王渥趙與同引兵攻楊么。己未破皮真寨。俘賊黨陳欽等八十人。奪船三十。於是湖中小寇皆震恐不自安矣。時殿中侍御史常同論制置使王玘討賊久未有功。壬戌上謂宰執曰。王玘使據上流。可令岳飛自下流進兵。賊無所逃矣。今賊恃險與水。嘯聚甚久。譬如人病。若淹歲月。必生他疾。宜速除之。戊辰上諭執政論北方事。朱勝非等退而相語曰。上神武撥亂。而以至仁御世。內外歸心。清蹕所駐。億兆畢從。自然成都敵所以不能窺者。正恃人心以爲固耳。先是宣撫處置使張浚奏四川霖雨地震。蓋名山大川久闕降香。乞製文付下。時浚已出蜀而奏纔至。癸酉工部尙書胡松年遷吏部。端明殿學士同僉書樞密院韓肖胄與朱勝非議不合。力求罷。詔以本職知溫州。旣又辭不赴。改提舉洞霄宮。先是御史臺檢法官李元淪論保正稅長之弊。上諭宰執曰。役法推行寢久。失其本意。致富者益富。貧者至貧。民力重困。此宜講究。甲戌上又曰。元淪所論乃是民事。祖宗法固不可改。然民事急務也。孟子所謂民事不可緩。其令州縣條利害上之。初川陝宣撫處置副使王似盧法原同在閬州。及分陝蜀之地。責守於諸將。自秦鳳至洋川。命經略使兼都統制吳玠主之。屯和尚原。金房至巴達。命鎮撫使王彥主之。屯通

州文龍至威茂。命統制官劉錡主之。屯巴西。洮岷至階成。命統制官關師古主之。屯武都。特遣師古率統制官李進、戴鉞、王師古等。引衆打糧於河州。因襲大潭縣。叛將慕洧拔寨遁去。師古深入敵境。忽遇金兵與戰。大敗。師古歸大潭。內懷慙懼。遂隻身降敵。吳玠念其下忠義。不從師古以叛。亟撫定之。玠既併其衆。所統益以精強。然自此遂失洮岷之地。獨存階成而已。參知政事席益既辭使金。及金使對楊勣。又無一言之助。於是臺諫交論其失。二月壬午罷。以資政殿學士提舉太平觀。論者不已。尋詔落職。癸未。上曰。國家任用小人。當退之也。案二語頗不辭。緊年要錄作易曰。大君有命。開國承家。小人勿用。既審知其小人。自當退之也。朱勝非曰。陛下於天下初無愛憎。始謂其賢則用之。既知其非則退之。所以爲公也。上又曰。人或以開河爲非急務。朕語之曰。禹卑宮室而盡力乎溝洫。孔子以爲無間。然安可謂非急務。要措置有方耳。先是議廢觀州。下廣西帥司相度。未上。二月乙酉。上謂宰執曰。知其無益於國。便可廢之。然當時取之不足爲利。今日廢之亦須慮患。徐俯曰。誠如聖諭。元祐間棄渠陽。匆匆城中人未出者。爲蠻所殺。紹聖中唐義問所以被讒。蓋禍始於此也。鼎寇楊么。旣爲官軍所敗。其黨雖出降。而賊防之甚嚴。鄰居失覺者其罪死。間有得達官地保甲利其隨身之物。又殺而奪之。鎮撫使程昌禹乃募人能引隨者與獲級同。故降者稍衆。遂申朝廷。乞招安。時知樞密院張浚自蜀還。是月朔日。浚至潭州。留其屬官馮楫。同湖南帥臣折彥質。措置招安。丙戌。宰執奏其事。上曰。么等憑民嘯聚。守令之罪。苟欲自新。令王玘折彥質招之。以成朕好生惡殺之意。旣而行下招安。而賊以不堪昌禹殺戮爲辭。尋有詔除昌禹徽猷閣待制。知鎮江府。候招安畢日行。是月知樞密院事張浚還朝。浚

之出使也。嘗以秦川館爲學舍。以待河東陝西之士來歸者。給衣食養之。又新復諸郡。乞鑄印。浚以去朝廷遠。亦先鑄給而後奏聞。又浚被命取道東蜀夔峽。其至稍遲。於是侍御史辛炳言。浚被命宣撫。不能成功。輕失五路。坐困四川。用劉子羽輩皆小人。而殺曲端。趙哲。爲無辜。以至設祕閣以崇儒。擬尙方以鑄印。及被詔不肯出蜀。乞行黜責。炳。侯官人也。金左都監烏珠。與萬戶薩里罕。領衆十萬。復大入。犯仙人關。宣撫司都統制吳玠。乃預爲壘於關旁。號殺金坪。嚴兵待之。統制官楊政。言於玠曰。此地爲蜀阨塞。死不可失。當臨以強弩。彼不敢捨此而犯關。且地名亦善。破之必矣。於是金人至。亦據高阜。且戰且攻。壘玠與烏珠約相見。烏珠誘玠以王爵。不從。三月辛亥朔。金兵攻壘益急。玠命統制官吳璘。領射士號駐隊者。更迭射之。矢下如雨。敵死者布地。而復踐以登。玠遣政。與統制官田晟。出銳兵。持長刀大斧。擊其左右。夜布火滿四山。大震鼓隨之。壬戌夜。壘中大兵出。敵不意。攻烏珠薩里罕兩大寨。破之。連戰皆捷。金萬戶韓常。爲官軍射損左目。金不能支。遂遁去。統制官王俊。追百餘里。至鳳州。又敗之。是役也。金自元帥以下。皆令攜挈而來。又選取豫腹心爲四川招撫使。期不徒還。旣不得聘。則還據鳳翔。授甲士田。爲久留計。不敢復妄動矣。丙辰。端明殿學士江西大帥趙鼎。在洪三年。戢吏愛民。盜賊屏息。一方賴之。至是召還。辛酉。詔舉賢良方正。能言極諫。是日福建漕臣鄭士彥進讀。上曰。閩中地狹民貧。勿縱吏槌剝以重困之。官吏姦賊者。當劾不可默也。癸未。以待御史辛炳爲中丞。時宣州奏疑獄不當奏而輒奏者。不論罪。而給事中孫近。因疏駁大理寺之失。論宣州有觀望。乞併罪之。甲子。上謂宰執曰。宣州可貸。今若加罪。則諸郡後